



# Orang amanah makin tiada?

Tema sambutan Hari Pekerja peringkat kebangsaan tahun ini Pekerja Amanah, Aspirasi Negara dengan jelas menterjemahkan bukan saja harapan kerajaan semata-mata, tetapi manifestasi dan impian seluruh rakyat Malaysia terhadap peranan dan tanggungjawab golongan pekerja di negara ini tidak kira dalam apa jua sektor.

Amanah secara ringkasnya membawa maksud kepercayaan. Dalam konteks ini kita boleh merujuk kepada harapan dan kepercayaan negara dan masyarakat letakkan di bahu setiap pekerja demi pembangunan negara dan kesejahteraan rakyat.

Tarikh 1 Mei setiap tahun diisytiharkan sebagai hari cuti umum di negara kita sebagai pengiktirafan tertinggi kerajaan terhadap seluruh warga pekerja di negara kita sama ada pekerja awam maupun swasta. Hari Pekerja, Hari Buruh atau juga disebut Hari Pekerja Antarabangsa di peringkat global di mana masyarakat dunia meraikan dan mengiktiraf sumbangan pekerja serta kejayaan ekonomi dan sosial bagi pergerakan maupun kesatuan sekerja.

Kebiasaannya sambutan Hari Pekerja di negara kita dimeriahkan dengan perhimpunan dan perarakaran secara besar-besaran dari pelbagai golongan pekerja mewakili organisasi masing-masing. Di pihak kerajaan sambutan Hari Pekerja sering diterjemahkan sebagai wadah untuk mengiktiraf dan menghargai sumbangan pekerja dan majikan terhadap pembangunan negara secara keseluruhannya.

Kementerian Sumber Manusia misalnya menyediakan pelbagai kategori anugerah sebagai pengiktirafan, antaranya Anugerah Perdana Menteri Tokoh Mahir yang juga anugerah utama dan yang berprestij berbanding anugerah lain yang memberikan tumpuan kepada individu yang berkemahiran dan menyumbang kepada rakyat seperti Tokoh Pekerja bagi kategori kumpulan eksekutif, kumpulan bukan eksekutif dan kategori orang kurang upaya (OKU).

Majikan juga diberi pengiktirafan sewajarnya melalui beberapa anugerah seperti Anugerah Majikan Cemerlang bagi kategori syarikat besar, perusahaan kecil dan sederhana serta GLC di samping anugerah lain seperti Anugerah Majikan Berdaya Saing Glokal.

Malah, kesatuan sekerja yang sering menjadi payung naungan seluruh warga pekerja juga diberi pengiktirafan melalui Anugerah Kesatuan Sekerja Cemerlang bagi

kategori sektor awam dan sektor swasta. Media turut diiktiraf melalui Anugerah Media Terbaik (Media Cetak dan Media Elektronik).

Jumlah keseluruhan hadiah wang tunai yang ditawarkan pada tahun ini bernilai RM75,000 piala dan sijil yang diberikan kepada pemenang anugerah mengikut kategori. Ringkasnya sambutan Hari Pekerja diadakan dengan matlamat untuk mengeratkan semangat kerjasama dan permuafakatan secara 'tripartisme' antara tiga pihak iaitu kerajaan, majikan dan pekerja.

Hakikatnya matlamat untuk menjadi negara maju berpendapatan tinggi tidak mampu dicapai andai tanggungjawab itu disandarkan kepada kerajaan semata-mata. Dalam hal ini, ketiga-tiga pihak iaitu kerajaan, majikan dan pekerja perlu bekerjasama erat supaya dapat merealisasikan hasrat terbabit. Dalam konteks ini negara mahu melahirkan seramai mungkin pekerja yang ada nilai murni dan positif seperti amanah, bertanggungjawab, jujur dan ikhlas.

Sebagai pemain utama dalam hal ini, pekerja terutama perlu menghayati tema sambutan Hari

Pekerja tahun ini sebaik mungkin. Hal ini sangat penting kerana dewasa ini kita dikejutkan dengan pelbagai masalah salah laku membatalkan pekerja dalam pelbagai sektor terutama sektor awam.

Rasuh, penyelewengan dan salah guna kuasa semakin menjadi-jadi, malah tidak keterlaluan untuk dikatakan ia mula menjadi trend dalam kalangan sekelompok anggota masyarakat kita. Sedarlah sehebat dan semaju manapun prestasi sesebuah organisasi itu sekalipun, andai pekerjanya tidak menghayati sifat amanah, akhirnya organisasi itu hancur dan musnah begitu saja.

Pekerja yang tidak amanah tidak setia kepada organisasi apatah lagi memikirkan kepentingan organisasi itu. Mereka hanya menunggu peluang untuk mengambil kesempatan dan akan sentiasa mementingkan diri sendiri. Akhirnya masyarakat dan negara akan musnah secara keseluruhannya.

Oleh itu, sudah tiba masanya untuk semua pihak memberi perhatian serius untuk melahirkan individu dan pekerja yang beramanah. Usaha ke arah itu

perlu bermula sejak awal dan perlu berterusan di setiap peringkat melalui proses yang betul.

Misalnya sejak lahir, ibu bapa boleh memainkan peranan untuk menjadi suri teladan dan mendidik anak menjadi jujur dan ikhlas dalam setiap perbuatan dan tingkah laku. Proses ini selanjutnya perlu berterusan di peringkat sekolah, universiti dan dalam alam pekerjaan supaya sifat amanah itu dapat diterap dan ditanam dalam sanubari kita sepanjang masa.

Misalnya, pihak universiti perlu memainkan peranan untuk mendidik dan menanam aspek integriti dan amanah dalam diri setiap bakal graduan mereka. Hal ini penting kerana universiti adalah hentian terakhir sebelum graduan memasuki alam pekerjaan dan apa saja yang dipelajari di universiti dijadikan panduan dan rujukan utama ketika memulakan pekerjaan.

Ironinya kita tidak mahu rasuh dan salah guna kuasa terus menghantui pekerja terutama anak muda yang baru mahu mencebur bidang pekerjaan sehingga akhirnya merosakkan masyarakat dengan ideologi yang songsang. Setiap pekerja perlu sedar betapa aspirasi negara terletak di bahu masing-masing. Hakikatnya kita bukan saja

memerlukan pekerja yang berpengetahuan dan berkemahiran tinggi untuk membangunkan negara, tetapi lebih penting kita mahu melahirkan pekerja yang memiliki integriti dan amanah yang tinggi supaya dapat membina tamadun bangsa yang berjaya. Tiada gunanya kita memiliki kelayakan dan kemahiran yang tinggi, maupun pengalaman yang hebat andai ia gagal berpaksikan sifat amanah.

Ayah warga pekerja baik di sektor awam maupun swasta, mari kita memasang tekad untuk berubah menjadi lebih baik. Negara ini memerlukan individu pekerja yang berkualiti tinggi untuk terus memacu kecemerlangan negara dan bangsa. Dalam lain perkataan aspirasi negara kita ialah melahirkan pekerja yang beramanah dan bertanggungjawab. Biar kejayaan dan kemajuan yang dicapai itu seimbang antara kemajuan fizikal dan nilai peradaban dan kemanusiaan yang terpuji.

Sebagai pekerja kita perlu taat kepada negara, bertanggungjawab kepada organisasi dan amanah dengan kepercayaan rakyat. Selamat Menyambut Hari Pekerja.

**Penulis Timbalan Pendaftrar  
Fakulti Kejuruteraan  
Universiti Putra Malaysia**

## Dialog Kotaraya

Oleh Juragan

